

四庫全書

集部

欽定四庫全書

集部
梧桐集卷一

詳校官編修_臣翟槐

中書_臣劉源溥覆勘

總校官進士_臣楊懋珩

校對官助教_臣胡子襄

謄錄監生_臣馬步蟾

欽定四庫全書

集部六

梧岡集

別集類五

明

提要

臣等謹案梧岡集十卷明唐文鳳撰文鳳字子儀號夢鶴桂芳次子少而穎異長益自奮以文學授江西贛州府興國縣知縣改趙府紀善卒年八十有六文鳳宰興國著有政績泰和劉鴻嘗為作賢令祠記見程敏政所編

唐氏三先生集附錄中文鳳與祖元父桂芳
俱以文學擅名時號小三蘇其詩文豐縟深
厚刊落纖浮猶為不失家法其五世孫澤撰
墓表云先生著述在鄉校者曰朝陽類稿在
興國者曰政餘類稿又曰章貢文稿在藩府
者曰進忠類稿在洛陽者曰洛陽文稿歸田
後曰老學文稿今此編所存者止詩四卷文
六卷蓋不逮十之三四矣乾隆四十三年七

月恭校上

總纂官

臣

紀昀

臣

陸錫熊

臣

孫士毅

臣

孫士毅

總校官

臣

陸費

墀

墀

欽定四庫全書

梧岡集卷一

明 唐文鳳 撰

五言古詩

宿江口舟中見月

扁舟宿江口，露下夜初永。
孤蒲獵獵聲，葉颭風不靜。
缺月出未高，微波翻碎影。
王事有程期，無寐自深省。

又

舟行帆飛駛夜泊橈暫停月出湖水白雲開野山青沙
平集下鷺風迴約流螢迢迢鄉心切漁笛聲難聽

又

辭家日已遠到縣程將近是身如蓬梗飄泊何由定石
鬪浪聲齊月暮人影正江神願乞靈明朝風力順

四月二日因公出詣城隍廟行香同高判簿鄭
長司黃廣文及儒士鍾子常坐廟門之下觀一
邑境內之溪山喜而有作

我來宰斯邑倏忽十月餘縣庭紛聚訟好懷那得舒自
春已踰夏光景過隙駒人生百年間何為事區區今晨
偶公出廟門坐斯須山光列圖畫樹聲雜笙竽欣然樂
閒適不受凡俗拘吟眸豁無際羣峰環四隅愧匪廊廟
器亦非山澤臞自甘牛刀試民瘼何由蘇所期歲豐稔
憂時嗟術跡終當化淳俗擊壤歌唐虞

又

偶坐古廟垣趺此公事餘因得雅懷適更喜吟眸舒遐

思山谷士皎皎同白駒形迹脫物外聲名播中區自知
志有在凡欲無所須宜立齊王門所好異瑟琴冥鴻不
可弋馳馬不受拘何為書咄咄謀拙守一隅機深計非
左嗜淺形自臞當今聖明君蒼生望來蘇沾濡德澤廣
寬大法網踈願鼓南薰絃至治如有虞

初七日道經上馮坑

肩輿曉伊軋嶺峻不可度崖陰草未春雲暗天欲暮人
家駕險居農舍梯空住森森雪竹林垂垂雨樓樹我來

詢民俗遺老多物故頑澆可還淳為政慎舉措

過九曲嶺

峻嶺何峇嶢羊腸紆九曲澗沙水漾金石壁泉瀉玉行人若蟻緣巢居同鳥宿石欹疑觸頭路窄不容足民生樂康阜為政賴守牧當今堯舜君終化頑嚚俗

留方坑

茲行滯積雨連日留方坑棕櫚每多茂鷓鴣時自鳴山深氣猶冷雲暝嵐不晴年饑艱米食尊空少醪傾嚴刑

禁侵漁何由慰民情應慚居撫字報政當稱平

初度日有感

憶昔少年日父母俱在堂二弟娛戲彩怡怡稱壽觴此
樂不可得此景不可常情深風木感隕涕空悲傷每懷
鞠育恩有志苦未償今年踰知命髣髴已半蒼微名誤
舉保出牢山水鄉妻孥應念我遠在天一方旅思何鬱
鬱睽離慘中腸無為兒女態氣節當慨慷願言施政成
居民化循良焚香重載拜白鶴方南翔

八月一日寓衣錦鄉祖印院

今為衣錦遊未遂衣錦歸每憐江山是自嘆人民非道
路榛莽塞田疇禾黍稀經行詢土俗故老情依依劇談
昔日政貪肆同封豨懷奸比設阱嬰禍類發機幸遇聖
明朝民安家已肥嗟我叨邑宰才疎名更微願言竭愚
衷清慎志不違治平二三策何當達京畿寸心已淵淪
餘事猶塵飛投簪蚤稅駕清風舊漁磯

祖印院荒廢無僧僅有道人焚脩屋宇漏損予

命工瓦以覆之垣以繚之惟存孤松雙栢蒼然
凌雲感而有作

無僧禪寺古門關少人來於焉聊小憩兩廡取次開脩
垣去榛棘掃地除莓苔像設已漫漶檐隅亦傾頽孤燈
媚禪龕濁酒湛客杯俗器治難化民疲心可哀蹇予施
政拙牧馭非良才耿介自獨立肯受庸衆咍顧瞻此庭
祀佇立空徘徊惟餘松與栢風雨不可摧天矯虬龍姿
偃蹇梁棟材丁寧勿翦伐留護晴雲堆

登鑊嶺

朝登鑊嶺巔午下鑊嶺趾山脈自茲分水源由此始行
散千萬支逆流十五里湓汨螺灘平瀨淺石露齒開豁
錦里寬地夷樹攢齊我來詢遺老施政尚德禮人心險
於湍王道坦如砥當脫鼎鑊危應習衣冠美禾黍被郊
原牛羊散汀沚昔年謝征南功業傳國史至今祠廟存
祀饗薦芳芷慨古懷斯人九原呼不起

過葛聖公祠

按平川志漢末有葛姥來自交廣避黃巾之亂
遂留衣錦鄉家貲鉅萬有僮僕數千築城以居
西京志有葛姥城是也沒後鄉人祠以祀之凡
遇疾疫水旱禱之輒應宋朝屢加勅封錦水聖
公至今猶存石像

山形似飛鵝下浴碧潯水波光湛潭心沙痕露洲背龍
井神物藏禱旱致霖雨地靈鍾石神林深嘯山鬼思昔
炎漢末黃巾徧寰宇負乘敢竊攘稔惡肆奸宄葛姥亦

何賢辟地來茲處至今千載餘厚德人所與松風響哀
絃天籟咽悲語鄉民重遺愛祠廟俯溪渚春秋嚴祠饗
揭虔奠芳醑雲散山青青神遊向何許

經大嶺山

經行大嶺山登陟路危險鳥道凌千尋羊腸紆九轉擔
摩肩血頰屢嚙足皮蠶人家俯欹崖農屋梯層巘春碓
水傾槽饌厨泉注笕床折支青松礎壞蝕蒼蘚在昔事
游劫嘯聚俗汙染而今沐聖化頑犢漸消遣嗟我職

牧民才疎自慚醜一念懷慈仁寸心抱忠蹇涵濡德未
融施設政猶淺三年極撫綏凶邪期脫免

望蓮花山

峩峩蓮花山萬仞高崔嵬田形級階梯峰勢層樓臺四
時風雨暝半日雲霧開昔年遭廣寇民屋俱炎埃田疇
已荒穢垣墻半蒿萊皇威赫斯怒令行速奔雷大將禍
旗森天兵自南來殺戮遺孽盡鬼哭聲哀哀膏血塗宿
莽髑髏蝕蒼苔至今十載後寧謐毋驚猜嗟予膺寵命

治邑慚非才勞心勤撫字民物何康哉

訪鄒公寨

衣錦鄉郎團大坑山亡宋奉御鄒公澤丞相文
公天祥屯兵營寨於此累石為寨門隘塞三層
至今猶存故迹是時二公召募義勇勤王開都
督行府襁褓之際天色晦暝一夕雷風去其牌
額府字只留三字都督行識者已知宋之不競
也未幾與元兵合首戰于中洲不利

中洲云相傳在衣錦

鄉下再戰于空坑又不利

空坑吉安府永豐縣地名

文公兵

潰夜遁後騎追逼有石峨峙山麓公與母太夫人脫身走石忽仆橫道擁其後以故追者阻不得進今尚呼相公石時公妻歐陽氏妾黃氏子一人佛生女二人柳娘環娘俱被執公至廣東潮陽為兵所獲由是北行矣

險隘郎園里迢遞大坑山可怜興王地不在深谷間平生文丞相報君寸心丹同行鄒奉御總戎石為關襦旗

召義勇朔風吹雪寒天心厭瀆亂國步遭艱難元兵威
破竹列郡無一完居然就執縛北上何當還日月雖云
遠天地應更寬安能著此憤血淚不可乾汗青忠臣傳
千載永弗刊我來訪遺跡故壘雲漫漫

重脩安湖書院 有引

有宋咸淳十年臨川何時任興國縣令以衣錦
鄉僻遠在萬山間去縣治百餘里常頑獷瀆亂
邦經號稱難治惕然憂之思變其習俗迺建安

湖書院於洩龍之地置師生以訓迪其鄉民始知學距今百五十年殿庭廊廡俱就傾頽洪武庚辰秋八月予因撫安人民至是以學校之興廢迺守令之責為教化之源所當先務也遂命工重脩經始于是月之十有一日以俟落成感而有作

崇岡若盤龍茲地極高爽何令臨是鄉政教昔攸掌周迴廊廡成宏深殿庭敞構屋鳩良材買田收沃壤訓迪

師有方教育士有養朝夕勤絃歌春秋嚴祀享皇恩雨露多聖道日星朗迄今百年餘墮廢盈草莽我來重謁拜遺像愧瞻仰碑碣載雄文綵竹留餘響識此風化源六經期再講矢言力興脩述詩告吾黨

謁先賢祠

興國雖僻遠先賢昔所治有宋程太中遺澤常在茲二子隨侍宦義方訓書詩猗歟周元公天挺賢哲姿大道晦復明元氣淳化漓平生懸冰鑑一見深相知授受斯

有託繼絕百世師至今過化地瀛洛留專祠何公任興
叔歲久日月馳荒廢行復理終當還舊規嗟我重謁拜
薦芳酒盈卮高山頻仰止悠悠起遐思

讀蛟峰文山碑

安湖書院有方狀元蛟峰文丞相文山二碑石
猶存何令與二公同登第

何年叔書院在昔咸淳時固識教化首經營闢新基狀
元飽經術丞相工文辭名聯龍虎榜身居鳳凰池令尹

亦登第同折仙桂枝相知書偉績鑿鑿鐫穹碑忠義千古在光燄萬丈垂奇音鏗金石美奏諧墳簞嗟哉去已遠遺愛民猶思自慚踵公後施政甫及期願言再興脩遠大以為期摩挲頻細讀懷古空漣洏

過獅子灘

朝發龍王祠暮過獅子灘怪蹲石磊磊細激波潺潺形疑鬼工鑿跡類神斧剜我今問風俗黎庶當撫安慨茲水勢險漕運良獨難移檄召丁夫分流殺奔湍架木以

成梁隘石以為關從茲獲寧順扁舟輕往還既無覆溺
患亦無負荷艱民生喜粗給公租幸早完催科慚政拙
忝竊居微官老臣肯負國効職輸寸丹

憇廣法院

院在中洲

中洲有古剎亭午聊小憇禪龕映苔痕佛衣濕嵐翠燈
炮乏油滋香炷無火試尊者十八人現世恁遊戲了了
性自靈如如形更異當年方廣寺天台奇勝地石橋夜
月光赤城朝霞氣我來恣流觀懷古念興廢惟餘老孤

衲欲問西來意聾耳寂無言野狀著芒屨歸舟不可留
一篙秋水駛明朝回縣庭沙際迎候吏

洪武辛巳閏三月初九之吉陪同守郭公遊靈
山徘徊歷覽山水之勝可娛心目承命賦詩謾
成古體一首錄藁奉呈惟冀采覽

峩峩空同山巨鎮峙江右岌業凌穹蒼磅礴踞坤垺靈
山在平川突起峰巒秀何年構禪宮金碧絢晴晝深淵
每潛龍空巖疑伏獸鐵石噓涼雲珠泉瀉寒溜連林竹

影移滿道松陰覆澗流響琴筑岫勢列蓮豆木客聽講
經山鬼伏施呪萬景自森羅百靈誰領袖今逢三月春
草木正芳茂奉陪賢別駕幸尾車塵後遊覽謾徘徊嗟
哦應逗遛小酌酒味醇初煮茶香透我侯德政傳十邑
期借寇何當拜丹墀鴻臚為敷奏

題水石古松圖

高松未化龍僵立古澗旁飛泉落天外懸流千丈強勢
來蒼石峽六月灑雪霜滔滔朝宗意入海瀦汪洋嗤彼

采藥兒一葦何由航
曷若長在山觸石鏘
琳琅猶疑水樂洞
常居白雲鄉誰人
胷次濶點染歸毫
芒淺波飢竊立渟
淵蟄蛟藏瀟瀟雜
風雨靈根茯苓香
我欲問羣仙乞我
辟穀方大材當愛
護留待作棟梁

題古木懸流圖

蒼峰萬仞高古木
蟠危根下有深澗
壑欹波懸流奔紆
縈百千折渟淵杳
無垠雪花亂飛洒
雲氣互吐吞峭崖
束為峽兩山開作
臺太古凍冰積四
時寒霧昏枝僵蛟

龍骨皮皴苔蘚痕棟梁不見取匠石誰與論獨留鎮空
谷歲月常永存精神會元氣長養資厚坤豈知鄧林產
而有遺材尊滔滔東逝水朝宗念君恩

考滿舟經十八灘因分各灘名賦詩

鼈灘

茲灘試初程崖分色如鐵中流僅容舠怪石何叢葉大
者類鼈鼈小者狀龜鼈胡為取其名戒險天所設春波
瀉綠雲寒沫飛白雪勢急篙弗支力雄纜俄絕所以經

行人念之情內熱撼地怒雷奔旋颶急電掣左手掖豐
隆右手招列缺勿遺毫髮差性命輕一撇皇天念老臣
豈忍微軀滅區區忠信心終當保明哲

古鏡灘

一灘復一灘如何名古鏡豈非水激清寒碧淨而瑩鑑
此鬢眉真燭此形容正質柔陰氣凝性靜金精孕不鑄
首山銅不浮泗濱磬匣空游塵昏月冷妖墓屏輕帆那
可張每畏風力勁雨波春更狂冰漸寒未凝綆奕宜牽

長石很敢鬪硬呼酒酹江神薦芳致予敬衰年存節操
全彼天賦命花縣復歸來更勤恤民政

天柱灘

斯名本高峰移之托灘水潺湲聲肯停春波學龍語源
口百尺流山中一夜雨沙痕自齧蝕石勢尤齟齬地隘
有涯岸水束無洲渚舟楫濟不通制器聖所取如何逢
險艱利物功弗與我欲問禹王楚粵未經步遺此䟽鑿
功斯民尚罹苦迺無巨靈掌亦欠五丁斧願繼清獻公

萬夫力如虎會當阻阨平永除號天柱

小湖灘

水渚小湖水石積危灘石石巨相犄角水駛自激射欲
度尋丈險迺望咫尺隔愧昧縮地法恨無登天翼如馬
戒舟航飛鳧輕履舄我今值考滿三年課書績小船窄
於斗篷底何局躋凌晨此經過涉深鯨波碧隣西雨暈
虹向東風退鷁毋肆以弗虞每慎而自慄迫晚獲平安
至喜情尤適雞酒賽神歸隔烟聽漁笛

狗跡灘

巖穿露昂頭石滑印餘跡何年天狗下舐血變成碧遂
免遺其蹤獲豕失其蹄至今灘得名圖誌忘紀實淵深
自沈沈水湛亦湜湜浮青荇帶牽暈翠苔錢蝕戟翼雙
鴛鴦浴毛數瀾瀾於茲設天險濟涉費人力河伯願息
怒陽侯已効職助順徵神靈清漲滿三尺穩送下東流
布帆颿風急自慚拙催科當考陽城績

石人灘

石出如人長灘名以茲顯蘿衣綠乍綴苔髮翠初剪雲
凝身覆裸雨零淚流泣影浸浪紋搖足踏波痕淺至今
屹以立不逐流波轉有時氣鬱蒸陰火炊甑甌有時風
瀆淪神力旋磴碾我買西江船三月涉危險潭空巨魚
潛沙擁饒蛟遠陵谷永不遷桑海何曾變考績膺清裁
幸與天官選平生撫字心施政當力勉

貉獺灘

貉為山狐種獺乃水畜類云胡一灘中異性豈同聚今

始知其然有石高鼎屬朝夕相舂撞千古流不去聚腋
難為裘得魚豈能祭百川俱朝宗到海已東逝我來治
花封懷徠念民事當為忠謇臣肯負清白吏羞澁錢留
囊光怪詩盈笥三年朝帝京扁舟風水駛父老有深期
臨岐忍揮淚旋臚當再經浩蕩波聲注

銅盤灘

黃帝昔製鼎鼎象神姦懼尚遺首山金斯盤幾時鑄天
地為爐燃陰陽為炭聚龍伯來鼓燄海若出傾注器成

不敢用真宰愁應訴一叱留茲灘墮波激餘怒羣石驚
起立詭狀自呈露罔象遠潛遁神靈每扶護從此絕艱
虞舟楫通濟波妥帖濤浪息有若履平路而我述勝概
欲去仍返顧悠悠章貢江千古同永固

清洲灘

湯湯清洲灘泛溢波不殺兩厓屹相向峽束若關隘源
瀦庾嶺流支接章江派餘勢尚洶湧狂聲自滂湃終日
雲氣屯六月雪花洒燃犀照水族溫嶠應好怪具服呼

石丈米芾曾下拜
篙師力不齊
怒目何睚眦
世人意不合
細故多蒂芥
嗟我才非長老
氣猶豪邁
賦命從數奇
清神飲沆瀣
益重吾民思
甘棠歌勿敗

梁灘

危灘石作梁
橫截中流壯
滔滔向東逝
逞怒不得放
砥柱迴狂瀾
百川此其障
波神有餘憤
氣驕猶張王
我欲就安妥
投檄相誚讓
爾心亦豈忍
急為收洪漲
勿湧九江
濤勿奔三峽
浪我有寸許
膠息渾一千
丈爾當守激

清肯遂濁涇蕩江山必有神司宰任忠諒行當率吾民
牲醴嚴祀饗願言沛惠澤千秋永毋忘

昆侖灘

昆侖在西極山水皆所祖渾渾黃河源九泉元氣吐泄
此天漢津狂流萬萬古睠茲衣帶水亂石激其怒大聲
殷晴空闐闐震雷鼓青林飢鳥號白晝饒蛟舞驚湍起
旋風濺沫洒飛雨來往具舟航常哀覆溺苦欲填精衛
石欲射夫差弩安得黃帽郎膂力健於虎柔櫓頻叩軋

長篙

關

撐拄脫險一瞬間安流有神祐

曉灘

曉灘迺危峻暮灘亦隘陋中通一線波如注泰山溜風
鏃急難攢石鋒利莫鬪舟行一失勢糜碎不可救我欲
訴天君降勅責川后妖孽汝當驅黎庶汝當祐胡為不
汝職尸居手空袖天吳有九頭風鵠多大咩饒蛟自可
啄飢鰐亦堪蹂効順宜拊循竭忠能左右有德所當酬
有功所當奏海晏黃河清吾皇萬萬壽

鐵索灘

鐵索浪得名隨波不可繫自從開闢來鴻荒知幾世質
生資於天氣行注於地四海浩難極五湖渺無際叢爾
茲小灘怒流亦何駛浩浩復湯湯洶洶仍凜凜前舟既
已行後舟亦云至危若薄冰陷慄若深淵墜須臾性命
輕俄頃魂魄褫苟能慎所持蹈險德可企欲知利涉戒
當明大易義寄語江湖人風波宜早避

小蓼灘

小蓼灘居前大蓼灘在後岐而羣派分匯而衆流湊源
頭混混傾石罅潺潺漱我行泛孤舟正值陽春候晴光
滿溪山和氣暄宇宙王事有程期赴闕難逗遛雲隨征
旆飛雨浥輕衫透嗟我老侵尋髮禿面逾皺報政當考績
鴻臚名為奏承恩復任回鬱鬱棠陰茂訟簡民自淳琴
堂閒白晝江神德不忘祭饗答靈祐

大蓼灘

大蓼與小蓼兩灘豈云遠湖湘壯關隘嶺海設樞鍵滔

滔萬里流東去何時轉回盤接碧灣迢迢隔蒼巘囊沙
沙自擁叱石石皆偃長年用力齊捷疾如熊健舟行穩
不歎厄險幸脫免蛟藏伏蛭蜒龍歸潛蜒蝨風順獲安
流江神著靈顯隄柳綠烟凝溪桃紅露泣我來治山邑
光陰猶指撚撫綏政不苛花村無吠犬

錦津灘

西蜀錦江津相去萬里隔此灘名相符終古那可易不
盈十丈許湛湛漾寒碧飲虹蒸曉氣浴蟾浸秋魄射工

每伺人鵲鷁或呼客柳子記惡溪陶令卧醒石今古非
同時出處亦異跡而我莫諧俗迺有書傳癖豈敢辭驅
馳當盡臣子職鯨波肯憚險拏舟快所歷遙遙紫金山
在望猶咫尺明發不能寐帆開早潮白

漂神灘

歷盡十八灘石惡水尤惡漿盪退不前舟移碍乃閣窺
深若井投注高疑空落自省神每漂旁觀心更愕忠貞
固可仗性命抑奚托履險德在躬蒙恩秩命爵臣心敢

怠遑天意自昭灼我欲移沃焦漏泄使之涸我欲呼巨
靈擘裂用之鑿願言見安流怒濤息歎薄丹衷死即休
白首窮亦樂何須歎乘桴孔聖不堪作

惶恐灘

灘以惶恐稱訛傳黃公號昔年曾開鑿平治功已效千
金貨棄捐萬夫聲叫噪遺愛人是思厚德天所報深淵
宅蛟蜃怪石蹲虎豹走浪風若颶激波雨如電壞舟葬
魚腹哀溺有誰弔至今無此患賴公力能導民貨還有

無國賦通運漕往來絕阻艱利涉恁嬉笑青青歡喜山
行人且停擢至茲心始夷泠然發清嘯

挽蕭正固先生詩五十韻

慟哭宇宙間典刑日淪落來者已可期往者不堪作若
匪資前修何由啓後覺滔滔東逝波砥柱莫迴薄忽忽
西飛鳥長繩難繫縛不有大化功孰尸混沌樸欲俾斯
道傳庶許伊人託平生蕭正固碩學號該博諸史鈎玄
微六經別穿鑿道統望洙泗理源溯濂洛韓柳咀英華

朱張遵矩矱晶熒日星明潤潔江漢濯下帷工著述執
筆者刪削所以大江西儒林仰喬嶽譬彼剽犀兕光拭
青萍鏘譬彼制咸韶音動黃鐘龠聞望愈尊隆才猷更
昭灼朝廷詔徵賢三聘起巖壑治本具敷陳高談帝王
畧便民十篇書直言何塞諤枯槁蘇甘霖疲癯瘡良藥
帝曰汝布衣丹表亦誠慤錫汝以嘉宴旌汝以好爵迺
職王府佐陞辭甘退却飄飄紫塞鴻夏夏青田鶴豈料
震天威左謫無愧怍賜環召歸旋舟艤龍河泊綸音日

宣明堅志弗驚愕仍許陪班行顧問須寵渥俄然拜恩
除關陝司教鐸委分居芹宮無心慕芸閣諸生服講說
課試嚴條約誘掖祛愚蒙鼓舞振孱弱若求杞梓材工
師斧攸斲若治瑚璉器玉人石為錯化雨時沾濡文風
日磅礴得請喜遂初壁房老蓀葍早賦二宜休晚節全
至樂龐眉白於霜體健猶矍鑠遣興哦佳詩怡情動清
酌支筇步東阡躡屩訪南郭徑松偃舊枝籬菊綻疎萼
優游飽看山嵐光逗簾箔吁嗟疾纏綿二豎潛搆惡痛

失少微星寒芒殞天末有子克承家敦厚謹然諾仕途
車發輟藝圃弓滿彊作賓觀國光輔導任謀度遺澤猶
生存千古宛如昨載歌蒿里辭悲思滿寥廓

送蕭用道長史之桂林

長風吹征衣白日照穹顥朝辭金陵城暮向桂林道之
子富才華天葩絢文藻選職王府官輔佐擬師保鶴駕
日侍隨嘉猷事論討磐石固藩封德化服夷獠人生百
年間相知不在早既推學術尊亦慕丰姿好豈期識顏

面遽別感懷抱每念眼惟青自嗟首空皓丈夫志磊落
養氣充浩浩願言秉忠貞榮名亦為寶

賦宛平十景詩一十章送江弘德歸新安

黃金臺

層臺翼翼崇墉作者費黃金黃金誠可惜賢士亦可欽
成士奔義金散得士心苟不慎所寶循物徒浮沉良辰
方登臨送子情益深殷勤一斗酒欲別還重斟

白雲觀

飄飄真僊侶迺在白雲鄉朝雲以為衣暮雲以為裳神
游何縹緲形蛻亦飛揚千載邱長生執節上帝旁琳宮
永尸祝降福惠澤滂送別今戾止酌酒歌慨慷

居庸關

壯哉西北陲爰業居庸關維天特設險維地永奠安王
化大無外德並天地寬萬夫不敢開熊虎何桓桓拱挹
京畿近樂業民心歡今晨偶送客疊翠侵衣寒

西湖景

玉泉山澹源西湖迺淵深春波紫鯉躍夜雨蒼龍吟下
有芙蕖陂上有楊柳林溉灌饒黍稷德澤被古今隄防
日疏鑿萬載神禹心挹清以酌別對此消煩襟

盧溝橋

盧溝蕩中流石橋跨橫截巋巖鰲背高迢遞虹影滅冷
泠青蘋風皎皎黃蘆月往來行旅多泥淖沒車轍惜別
歌驪駒歌聲何激烈矯首涼雲飛為送南歸客

玉泉山

蕩蕩神京地
峩峩玉泉山
一澗灑雨細
六月飛雪寒
銀河繞雲闕
玉虹掛天關
中有龍所居
萬古波不乾
為霖澤下土
豐年民物安
行人挹蒼翠
目送孤鴻還

宗師菴

宗師乃天人
神光目如電
靈章九龍文
寶匣七星劍
暮辭龍虎山
朝謁麒麟殿
賜地卜菴居
蓬島瑤樓現
至今未百年
劫火已更變
我來訪遺蹤
惜別情忘倦

育王塔

誰建阿育塔天遣鬼工鑿八風不動搖四時相犄角日
影標搏桑雲光動恒嶽星斗雜燈龕風颯語鈴鐸亭亭
管送迎晴空潔如濯向晚當離筵臨岐謾清酌

彰義門

古城臨孔道設此彰義門西林隱暮靄東岡見朝曦寂
寂孤客館依依遠人村行者步履勞居者笑語溫人生
各有適高誼古所敦臨風運深念去去誰與論

固節驛

悠悠驅車走去去策馬馳車馬日來往我心亦何為
此名舊驛固節益以奇人生宇宙內忠義弗可虧送我
同鄉友臨風動遐思酌酒復酌酒勿效兒女悲

題廣成子小像

大化妙亭毒賦予方成形聚闕乃其常胡為獨長生云

何廣成子能悟至道精闕問寶訣淵微叩心扃貌古

神炁炁顱圓髮星星至闕代下畫圖仰儀刑我欲往

從之奈此嬰俗情飛闕夜栩栩跨鶴超滄溟身留不得

往矯首三山青

題青蓮宇為性空上人作

我聞舍衛國布地皆黃金

闕

祇樹園鬱鬱旃檀林澄

澄七寶池涓涓功德水

闕

青蓮花非白非紅紫蓮生

下有根七竅常玲瓏

闕

菩提心了了能相通蓮開中

有莖莖斷絲猶繫

闕

鎖子骨勾連自支綴蓮老上有

房乃孕的實圓譬如舍利子凝結金石堅蓮居淤泥內

不受淤泥污譬如圓通性畧無罣礙故所以黃面老比

德良似之嗜愛每趺坐不傾亦不歌云何性上人解構
青蓮宇石塘湛澄碧紺葩點寒翠蓮葉何田田蓮蕊何
娟娟見蓮即見佛慕佛非慕蓮瓣瓣露慈容朶朶含至
性影搖曉日移質濯秋波淨有香復有色香色本非真
欲知無盡意悟此有漏因無盡亦歸無有因亦何有心
出萬劫前身居萬劫後栢樹解說法桑葉能通禪明月
我佛道孤月懸中天焚香誦法華好究西來意合掌問
上人如是復如是

題墨竹

風

雄風鼓餘怒，湘江起層波。
老蛟改窟宅，挈雲下巖阿。
蜿蜒骨在平陸，化作碧玉柯。
勢強不肯屈，敲戛聲相摩。
晴窓俯虛敞，瑟瑟秋思多。

雨

春雷起，葛陂陰霾滿。
四集零雨下，紛如脩鱗動。
潛蟄青凝琅玕枝，碧映雲母石。
洒洒淅淅微涼霏，霏霏帶餘濕。
遙遙凝琅玕枝，碧映雲母石。

望翠華尚憶湘娥泣

晴

淇園景虛曠滿林疎玉齊旭日散餘彩涼飈動淒淒晴
影布地密翠色含烟迷凡禽不敢下祥鳳何當栖遙遙
九疑山極目青天低

老

潛蚪躍重淵鱗甲半脫落未愁風雲生只恐雷雨作變
化不可羈虹光射天末含情望三湘翠袖侵寒薄皇英

金天月令言 卷一
久未歸蒼梧煙漠漠

題墨菊

西風吹墨池墨波染秋色幻出東籬花黃裳已成黑溥
露濕未乾涼烟淨如拭矯首南山高悠然寄胸臆

又

秋香不自惜隨意生毫端枝葉巧點綴疑帶朝露寒深
叢未容把落英誰復餐陳玄能換骨寧似東籬看

題枯木竹石畫扇

何年泛星槎手拾支機石尚帶銀漢波涼沁秋雲濕脉
脉織女愁付與湘娥泣至今明月中照影留遺迹重華
不可招彷彿疑山碧

悠然堂

若人抱奇趣寢跡辟俗喧結屋依故里喬木非荒村平
生謝軒冕詩書夙所敦遠懷陶靖節此意誰與論種秫
秋已熟藝菊寒始繁東籬何必往南山自當門悠然契
心目樂矣終忘言痛飲聊自適濁醪湛空樽

送潘信卿用李太白送韋八之西京韻

南山有孤鳳，刷羽遠飛去。
枳棘不足栖，託彼梧桐樹。
仙人王子喬，吹笙儻相遇。
聳身視九州，茫茫但塵霧。

題石門陳伯仁聽泉樓

單居石為門，崢嶸構高閣。
地遠人跡稀，林深樹影薄。
急雨曉度山，幽泉夜鳴壑。
鏗鏘滿聽清，滴瀝疑夢落。
輕跳颺回颺，直瀉下穹窿。
寒生襲枕屏，氣潤入簾箔。
於焉謝塵氛，忘機許猿鶴。

冬夜夢子紹兄

天空星月高城迫笳鼓咽夜長苦多寒微燈翳明滅覆
衾未及暖睡眠已交睫悠揚竟何之恍遇遠遊客驚怪
會面稀胡為久離別儻非兄弟親安得魂夢接干戈今
未休殺戮那可說原野日積屍江波日流血南遊觸蠻
烟北走犯燕雪涉水多蛟龍投荒足妖孽毛髮侵風霜
肌膚戰寒熱危顛命弗顧奔走骨欲折嗟嗟困羈孤何
由保明哲功名既難成歲月如電掣榮華夢蜺國富貴

探虎穴致身亦已愚秉志何更拙故山豈不佳尚有揚
雄宅家聲幸未墜猶宜守清白弟也百無為林泉託跛
蹙

木假山為吳維新賦

歙州跨江左山水天下奇花屏列東壁黃羅倚西陲天
都向北峙城陽肆南馳雲邊簇蠶頭屋外勻蛾眉所以
林泉士嗜山如嗜飴嵐光滴闌楯翠曖沾檐楣如何猶
未足愛此朽蝕遺一拳勢瑟縮咫尺形嶽嶽被以青葛

蒲濁以寒漣漪想無六鼇載應有羣蟻窺棟梁不見取
匠斧那能施祇被風雨厄流棄荒江湄茲焉遇賞識可
喜亦可悲真山自足翫假山亦奚為羨子久成癖而我
昧未知意欲架穹窿入窓影參差酒狂喝羣山端拱於
庭墀

送魏克讓除陝西憲府經歷

魏侯秉清心有若五弦琴能諧太古調中含至和音一
彈別鶴舞再彈離鸞吟自可賡白雪何煩鑄黃金寥寥

師曠耳悠悠虞舜心廟堂歌南風為洗吳哇淫

暇日同鄭以孝遊定光庵坐志喜亭上以池清
龜出曝松暝鶴飛回為韻各賦十首用紀一時
之清興云

登臨試輕步及此涼風時怪石度危砌幽泉下深池山
銜落日短鳥度遙天遲俯仰一長笑嗒然遂忘疲

又

高城獻雉堞淨地鄰市聲雲含竹陰冷天浸池光晴岨

腰怪藤絡石，鐘香蔓生流。曠景何限詩，成寫吾情。

又

亭高煥華扁，依山闢新基。瓦排脊峨獸，碑立趺蹲龜。美哉嘉禾頌，允矣甘棠詩。遺恩久不泯，千載長在茲。

又

空寮積塵生，僧病縛禪律。索空飢鼠跳，衲破饕蟲出。險崖石可梯，荒井水堪繙。我欲叩心宗，此理待誰詰。

又

叢林占清幽恍訝古天竺風虎抱雲眠雨禽迎日曝竹
瘿瘦根長栢病危枝禿何時偕藤床坐讀傳燈錄

又

危亭帶近郭虛窓納羣峰蛇涎滑勁竹龍骨蛻怪松東
山想謝傳厯下傳李邕起我懷古興憑高豁心胸

又

芒屨溢行蹤疎雨不滑徑石泉洒雪涼野樹栖烟暝香
消歇殘經風微度幽磬老衲坐蒲團禪心初入定

又

乘興造禪關清游景堪樂鉢飭施飢禽
函經護馴鶴嵐光眼底浮雲景手中落
蒼蒼天四維連峰瘦於削

又

倚闌興未盡坐久心忘歸樹遠砭雲出
鴉回背日飛地接市喧近境留塵迹
稀朗吟下山去松風涼葛衣

又

天開兜率境何殊雨花臺山鬼受經去
癯龍聽講回印

竹青活雨禪龕紫封苔他年棄俗慮避世心悠哉

古風

大道常不泯萬古如日新却笑秦始皇六經飛埃塵徒
有桀紂暴豈識唐虞仁親序屬父子爵位分君臣雖滅
古聖書不能亂彝倫平生爭戰苦二世空沈淪

又

玉環傾國姿胎禍亂中土明皇開元初德政稱仁主後
來恣貪歡白日送歌舞煙塵起漁陽神京滿鼙鼓幸賴

肅宗賢扶危復唐祚明皇亦何心却被顏色誤嗟哉去
已遠遺恨流千古

又

日落依舊出花落還再開如何人委棄一去不復回達
賢每知道適興銜金杯讀書窺往事立功圖雲臺憫彼
名未成聚散輕烟埃思之五情熱咄咄堪悲哀

又

蘇秦古辯士特生戰國時欲說萬乘君豈肯甘賤卑憶

初志未遂憔悴衆所欺有妻不停織有嫂不為炊骨肉
尚如此他人更奚疑

又

不慕身後名但戀生前酒酒傾愁不來果是掃愁帚彭
祖壽最多一去千載後鄧通富銅山餓死復何有二子
豈解飲祇知富與壽未若我達道得酒肯置口東風昨
夜來搖蕩庭前柳出門一長吁茫然但搔首

又

劬書析理義讀史窺成敗我生未成名疊疊歲月邁嗟
我井底蛙識見真狹隘跳踉尺寸間豈知天壤大

又

乾坤大磅礴豈乏千里駒柰無伯樂顧空受駑駘欺如
何掩下乘蹭蹬筋力疲一朝欣所遇毛骨稱拳竒洗刷
泥滓淨展步如飈馳芻豆尚不飽敢賜金鞍騎

又

我有太阿劔磨淬利鋒銳憶昔豐城獄氣射牛斗傍儻

無張華識埋沒吁可傷千年土不蝕寶匣生光芒風塵
久瀕洞此物寧敢藏

節婦呂嘉貞

人生如石火倏忽無停光來者日以續往者日以忘陰
陽自不息死生固其常悠悠就泯滅有志當悲傷所以
貴自立卓然振顏綱男兒慕勲業才高萬夫良女子守
貞節秉心百煉鋼一生雖云短萬世亦以長齟齬苟無
譽弱草栖秋霜云何呂家女薄俗能激昂啾啾衆鳥羣

劃見孤鳳凰白及不辭苦青春謝紅妝大義既已著委
順名益彰香魂掩幽壤高墳多白楊餘芳垂竹帛肯愧
紀述詳黃山鎖愁靄濕翠空蒼蒼

林泉歸隱圖為王悅中賦

大隱與小隱城市異山林豈徒貴隱迹并得隱者心心
迹既高尚不受塵土侵若人抱姱節早已抽華簪泉石
闕幽趣於焉事追尋霜松落踈影暝鶴有遺音刈秫作
美酒適興成孤斟悠然任天性手弄焦桐琴紫雲近接

金史卷一百一十五
卷一
眼睛空露微岑結廬何必廣出處計已深吁嗟慕彭澤
高風古猶今

送羅生伯達升國學

梧桐生高岡綠葉何歲蕤所託既得地暢茂諒亦宜醴
泉溉其根甘露濡其枝鳳凰鳴噦噦朝陽影離離諧和
五音具孕材良且奇神靈不敢惜哲匠頻顧之斲成美
琴瑟登歌清廟時羅生秀而整有若碧梧姿持此欲安
往俵俵求所知論心必有遇世豈無鍾期何當獻天子

再歌南薰詩

銅駝巷

古巷乃隘陋猶說銅駝名想當炎漢日冶工鑄始成首
山化金氣棠谿泄金精紅爐氣磅礴烈燄光晶熒煽韞
神力助鈴椎鬼魄驚拱衛擊五雷呵護煩六丁猙獰異
獸出繚繞長虹縈千年鎮厚地留茲洛陽城摩挲幾嘆
息會見荊棘生山海有傾竭陵谷多變更詩人重紀述
感激傷吾情茫茫付陳迹餘憤何由平

澗水

在城西十里偃師縣與伊洛瀝四水合流入黃河

伊洛與瀝澗四水名尚存當時周室盛營此王城尊環
繞壯洛邑朝東入河原疆場臨關塞源流接藩垣九里
餘澤潤萬古狂流奔浮汨涵太虛沉浸奠乾坤霜寒洲
渚縮雨暖波濤翻下通黃河流終古何渾渾乘槎訪支
機河浩隔天孫影徹漢津遠氣蒸星斗昏嗟我倦行役
老景傷精魂沉吟興未已落日傾金盆

題東園道人晚釣圖

槐池湛晴波日光斂餘照樂彼池上人乘閒晚垂釣悠
悠七里灘高風許同調爾祖昔釣鰲金門曾待詔亦有
孫子賢事業遠堪紹不泛窮河槎當鼓濟川櫂豈有終
隱淪長才處廊廟尚父心已許巢父首猶掉鬱鬱喬木
陰濃翠供吟眺固無羨魚志投竿發清嘯自知天所與
不為人所料矯首吳天高紫烟橫遠嶠

詠棋

書堂春晝永閒拂文楸枰沉思出神妙握機布縱橫後

粘勢已緩先著心尤精或踈而致密或危以求生勝算
如張良奇計猶陳平厄比馬陵道嚴於細柳營俄然收
偉績凱奏銘功成遺圖尚留迹靈經久傳名但能謹始
終何須較輸贏動靜各有辨奇正還相傾千年八陣法
石漾江流清隆中老諸葛長吟寄深情

又

大聖有唐堯創法何明智妙測鬼神機巧泄陰陽秘子
圓訝布星局方疑象地三百六十路億兆萬千義相對

試手談所得在心計要識生死關當知動靜勢點白既
已難拈黑亦不易自經下著遲遽失加倍利靈變通仙
術謀畧豈兒戲如環乃無端似屏而有倚首尾常山蛇
奇駿滎河驥洪濤縱巨鱗秋空橫獨鷺或疑偏將軍或
居大元帥堂堂列營陣正正張旗幟嚴整猶合隊紛糾
若離次衝突左右車游擊前後騎出險喜獲安升高慮
將墜困圍每堅壁示敵從緩轡減竈佯退怯伏弩潛夙
備就粘必可待投劫尚堪致始疑倏終信遠謀俄近基

輔漢陳曲逆救秦田無忌勇躁久用挑飢貪急吞餌敵
愼急擒首修睦誠委質氣餒應俟養鋒銳欲少避守關
恃其隘背水定其志撞斗嗟范增奉檠快毛遂慕經古
攸同兵法今奚異是以博識人察此精微意畧刻弗暫
忘閒適乃能置竹院每聞聲玉堂常近侍瀛洲風日好
巴園歲月駛沸鼎茶香清拂枰槐影翠承恩諭賦詩效
愚敬題字愧乏杜老才陋匪柳公記斐然成短章冥搜
五經笥

詠琴

古琴絃

音巨亦作桓

七弦而能諧五音寥寥白鶴唳杳杳蒼

龍吟相傳南薰操應念虞舜心民物乃康阜解慍恩德
深

諸葛孔明

王道既以熄霸業亦就隳秦起居閔位漢興承帝基綿
延四百載炎祚德日衰當塗轉亮悖挾威神器危天心
有所托孳歸大耳兒為求匡輔任夢卜何人宜誰識隆

中叟道合司馬知卧龍自偃蹇肯學忘世為三顧煩枉
駕幡然出無疑欲纘東都緒便把西蜀麾諸將敵萬人桓
桓熊虎姿讒說莫能惑魚水情怡怡益郡遂款附荊州
從政施經營事征伐吳魏相奔馳竟成鼎足勢山河壯
藩維袖中出師表快讀涕淚垂祈連路寂寞褒斜谷險
巖流光將星墮憤激巾幘遺大厦窘風雨一木誠難支
千年八陣磧長江漾寒漪

驍將

天賦驍勇姿世稱萬人敵猛奮拔山勢健伸扛鼎力叱
咤聲如雷羣馬皆辟易出沒聲若風獨鷲自搏擊古將
應難儔今人更無匹伏弩發馬陵烈焰熾赤壁怒瞋目
流電威震鬚森戟鎮國屹長城戍邊窮異域報捷書露
布奏凱馳羽檄能踵衛霍功可繼關張績臨陣設兵機
忠君效臣職會當圖雲臺千載名烜赫

喜雨

皇天久不雨一雨成歲功君心妙孚感膏澤施無窮遂

令封域內禾黍咸芄芄物物皆滋潤幸茲和氣同天道
日以昭君德日以隆至誠格上下惠政敷西東舟車達
四境耕鑿居三農太平臻盛治民俗如幽風從今書大
有擊壤歌時雍

六月二日王御東閣揮洒睿翰之暇適有青鳥
飛集于前馴狎而鳴似依人而托得其所者因
命畫工為圖以紀其異臣聞唐太宗臨幸太液
池見青鳥裴回容與欣然適意急宣闔立本圖

之今臣等獲觀茲事與昔相類謹各賦詩以
進

翩翩有青鳥飛集東閣前不食瓊田粟自帶瑤池煙暮
辭海南雨朝翔冀北天為銜雲錦書禎祥兆延年

奉賦禎祥詩有序

恭惟賢王欽奉皇上勅命留守北京翊贊聖謨
敷施仁德四年於茲上有以宣朝廷之恩下有
以安邦域之大瑞麥獻於闕廷嘉禾產於禁苑

甘雨時足卿雲日呈元龜黑質而金紋靈兔白
毫而瓊體誠所謂天不愛道地不愛寶發祥効
禎而有開必先者也謹詳述為歌詩以獻

聖皇御正統恩德洽萬方上膺天命集下纘帝業昌一
舉天戈揮再舉龍旗揚仁風息溟渤妖星掃欃槍朝野
歸清肅奸諛斂披猖功成邁湯武治浹同虞唐南服交
趾夷西警陰山羗萬年保宗社九州奠封疆玉冊啟大
國璽節尊親王勅命出留守北京居帝鄉四年宣政化

王澤日以霽明時遇隆盛和氣感禎祥甘雨自沾足卿
雲亦飄翔珍禽時下集翠衿雜明璫仙鶴每馴舞縞衣
間玄裳瑞麥穗含秀嘉禾實吹香靈兔潔瓊質元龜耀
金章神拱霞炫爛神龍雨騰驤天花亦繽紛毫光何煒
煌自茲諸福物萃此世太康誠心一以著孝德久彌彰
盛事傳不泯史冊長流芳欲効歌頌美當書紀述詳詞
臣愧才菲白髮凝秋霜寸心瀝忠赤千載永弗忘

再奉賦喜雨詩

皇天少甘澤禾苗就枯槁何以慰三農
據誠事祈禱賢王啟睿衷封章達窮昊
上帝潛感孚炎埃急除掃雷驅雨濛濛
風走雲浩浩乾池瀦聚水平陸注行潦
登場已收麥被畛方茂稻畝畝潤黍菽
村疇榮桑棗鼓舞喜兒童歌謠樂耆老
徭役蠲免多賦稅供輸早寬恤沐深恩
仰載荷洪造應書大有年秋成登萬寶

梧岡集卷一

欽定四庫全書

集部
梧桐集卷二

詳校官編修臣翟槐

中書臣劉源溥覆勘

總校官進士臣楊懋珩

校對官助教臣胡予襄

謄錄監生臣馬步蟾

欽定四庫全書

梧岡集卷二

明 唐文鳳 撰

七言古詩

遊東龕巖賦十景詩

女媧煉遺補天石六丁下鑿開巖室山靈閔護不敢居
留與令公讀經籍至今猶聽吾伊聲剛風吹度淵龍驚
白雲千古封故迹汗青不朽傳清名

右讀書巖

東龕古刹寄巖麓令公讀書有遺蹟
瑟瑟風語龍髯松
瀟瀟雨敲鳳尾竹流傳香火將千秋
晨鐘暮鼓雲悠悠
鸞笙鶴駕碧霄遠神歸故國應來遊

右東龕寺

無帆無楫空類舫不經江漲波濤漾
當年已辦濟川功
留得遺形巖石上縱令百丈那可牽
高歌擊節時叩舷
雲流如水疑欲泛滄海桑田多變遷

右石舫

空潭形圓小於甕寒泉注滿波翻永秋蟾落影如明珠
夜永驪龍應起弄若能變作葡萄醅酣飲吏部應時來
當年令公日嚙漱青山猿鶴無驚猜

右甕潭

雨沐蓮峰青孕孕移來宜付中書卧東溟為硯雲如箋
寫遍長天愁欲破令公手攜登玉堂鳳池波浸山蒼蒼
龍蛇鸞鵠有神助九霄夜貫晴虹光

右筆架峰

怪石兩分自中斷
形勢巍峩色璀璨
令公試劒劒有神
應識他年平內難
鋒鋌不鈍耀雪霜
匣藏三尺紫電光
若教砥礪剗犀兕
空使李廣驍弧長

右試劒石

放生湖中有金鯉
身帶銅環弄清泚
年多變態神化龍
三十六鱗雲氣起
已能濟世成甘霖
令公涵育恩澤深
白波茫茫不復見
千年空負琴高心

右銅環鯉

百尺飛泉如瀑布直瀉懸崖幾朝暮氣迷雲縷鮫綃垂
光射冰簾月鈎露當年為喚錦袍仙好詠銀河落九天
令公名同流不竭千古界破蒼山烟

右瀑布泉

尖石森然疑筍出恰類龍孫啟雷蟄草如籜解春雨香
樹若枝凝曉雲濕山鬼忍饒不敢鋤頭角放倚青天孤
何年成竹結丹實鳳凰飛來銜瑞圖

右石筍

兩股寒泉互交絡圍繞山腰遭束縛金鎖朝垂鉄石懸
玉繩夜浸銀河落當時曾繫內難克至今千古流無窮
我來滌筆寫奇句一條噴雪飛晴空

右索泉

題顏輝寫呂洞賓像

洞庭渺渺秋波濶袖中三尺青蛇活朗吟飛度天宇清
黃鶴樓寒桂香發一聲鐵笛月色新蒟蘆酒熟純陽春

豈知誤落顏輝筆千載風流前後身

題番人出獵圖

塞北天高風蚤寒將軍出獵原野寬
皂旗半捲鷹未放忽使潛逃狐兔殘
左韃右橐意氣滿駿馬翩翩嘶顧影
酒酣夢熟毼毼春月轉穹廬夜初永

駕鶩東飛天宇高馬鳴曠野風蕭蕭
將軍自是射鵬手憑陵志氣何太驕
一駿烏雲一駿雪四蹄踏遍天山月
酒酣時聽刺刺歌蒲萄杯深和瓊屑

驕驄旋轉如驚龍手挽一石烏號弓笑撚銀箭遙指點
背身射落孤飛鴻駿龍前行猶返顧日暮歸來足狐兔
醉中慢撥琵琶春漢月流光濕寒露

青絲手控拳毛騮邊庭雪冷多風沙錦袍綉鞍貂帽暖
女姬暈酒顏如花塞下雪飛大於席掣電追風去無迹
明朝獻獲單于歡炙肉行觴酪漿碧

題李息齋雙竹圖

雙龍已化葛陂水兩鳳初集丹山羽虞廷既遠費仙歸

留得瀟瀟雜風雨老聃文孫神思竒筆吐元氣何淋漓
一天秋興收不得踪影散作青瑤枝

舟泊吳城山龍王祠

吳城之山若拳小吳城之水深如沼上留遺廟久妥靈
下有潛宮更幽渺東湖西湖波合流望窮浩蕩天盡頭
雨滋岸柳春色淺烟凝渚樹朝光浮昨暮天昏風簌簌
停橈夜泊祠下宿羈懷磊塊不可降強飲一尊村酒綠
山川有神能福人和風瑞氣海宇春興周已起渭濱老

但願白首稱良臣

過左蠡滙澤龍王祠

長江渺渺天際來東滙大澤地勢開狂流播風噴寒雪
怒浪捲霧奔晴雷下有龍淵深莫測黑入太陰雲雨積
水府寬幽宮闕多虛明知是龍君宅龍君護國常顯靈
河清海晏波濤寧曾傳禹貢載篇籍每讀酈生窮水經
我來祠下顧瞻久羞牲膾鯉酌春酒遠渚青青已出蒲
平沙漠漠初搖柳神靈有喜蚤乞晴百里一瞬如鏡平

蛟鼉帖伏蜃氣散風駛若馬孤帆輕老臣白髮心猶鐵
自慚下考蒙恩澤當思補報恤疲民遙望五雲時戀闕

鞋山

大姑輕移蓮步搖脫却宮鞵浮晚潮湘妃亦失凌波襪
香魂千古恨未消五老為媒笑踈拙曾嫁彭郎怨離別
雲凝眉黛不勝愁心逐寒磯夜深月

大孤山

大孤山前波浪急蒲帆高張飽風力篙師酌酒為乞靈

一舸中流如箭疾龍王祠下鐘鼓聲江天曉日生新晴
五雲縹渺在何許紫金王氣浮神京

送金仲遠調遷大同衛掾

龍灣江頭聞蹋歌送行將柰離愁何離愁自深酒力淺
情比楊花飛雪多楊花飛雪雨初洗離人欲去行復止
大同遥遥西北天邊塵不驚嚴虎壘戍屯知有張將軍
將軍猛氣凌秋雲去年坐鎮滁陽衛今年承恩威遠聞
幙府金郎總才彥婉畫奇勲刀筆健人生要在心相知

青眼相看忘貴賤
太行渺渺千里途
鴈門關西黃草枯
番兒曉咽銀觥策
羌女夜煖紅氍毹
柳營肅令常鎮靜
霜冷月明角弓勁
他時考績赴銓曹
報最應能贊軍政
我留子去休遲遲
丈夫豈學兒女悲
秋鴻歸飛有寄字
為言別後長相思

格山隱居八景詩八章為休陽胡希永賦

古木龍蓀高倚天
皮皴榦老知幾年
喬枝上經鸞鳳宿
蟠根下有蛟蚪眠
三月春風日吹拂
葉幄團團拭新綠

每思世澤久栽培滿地清陰覆華屋

右古木春風

嶄然五石如人長蒼蘚點身雲補裳氤氲天外恁舒卷
曉日欲吐生硃光須臾變態澹無迹雲石常存千古碧
思親遙睇總關情孤鶴飛來破秋色

右五石朝雲

盈尖山高雲勒齊樵人采薪費攀躋斧聲響會通清唱
驚起一箇幽禽啼空林烟暝日將暮荷擔行行覓歸路

平生幾曲太平歌不識宮商有遺譜

右盈尖樵唱

閔口渡頭春水深漁舟閒繫垂柳陰有時鼓枻起清唱
聽來自是滄浪吟綠蓑為衣青箬笠九陌黃塵不留跡
鰕魚肥美酒新篘醉卧滿溪沙月白

右閔渡漁歌

小溪溪上危橋橫影落長虹波底明風翻水漾勢天矯
晚日回光秋雨晴不見隄西成五彩鳥鵲未來石填海

行人搖兀度雲空忽聽漁歌聲欸乃

右溪橋虹影

神人揮鞭馬不驚四蹄踏鐵無留行至今石磴印遺迹
玉寒隱約雲氣生忠烈功成封越國千古英靈猶不沒
嘶風幾度耀金戈汗血當年稱駿骨

右石磴馬跡

越國神祠人乞靈鏗鉤鐘響風前聽華鯨吼處月在戶
驚破幽居塵夢醒聲咽秋幾昏暮村叟溪童趁歸路

遙知敲斷故鄉心
渺渺關山隔煙霧

右神祠晚鐘

蓮堂夜靜秋氣清
繡經坐對山月明
流光滿地如走汞
南飛繞樹鳥鵲驚
去年見月歸故里
今年見月留客邸
陰晴圓缺許誰知
天香桂子涼風起

右蓮堂秋月

題百馬圖

戴君胸中著金馬
拂拭生絹恣揮洒
雄姿百足吐毫端

藝精肯在韓幹下驍騰八尺俄成龍宛在同州沙苑中
豐草青青飮暖雨長空漠漠嘶寒風或怒交蹄如虎搏
或喜昂身同雀躍低頭已却白玉鞍逸氣肯受黃金絡
倦餘搶地袞輕塵落花亂點雪滿身掠尾梳鬃浴江水
張唇浮鼻吞河津方瞳熒熒紫電掣遠道奔馳汗凝血
有時揩樹烏啄瘡危梢影動黃昏月子母回顧恰有恩
攬先退後咸超羣十五五工異態出沒隱見何紛紜
君不見八龍九逸難再得白兔飛黃有誰識遙憐教舞

解銜杯尚詫開元太平日左驂右驂無復施四閑五閑
隨所宜渥洼異種不復有千金市骨將奚為當今聖朝
逢至治衛霍窮兵事邊鄙蒲萄首宿朔雲深按圖一一
獻天子

鶴歎

衛公愛鶴久成癖曾置祿位乘君軒千年丹熟頂留暈
六月積雪衣無痕低鳴曉飲瑠池水舞影夜棲琪樹園
子晉不歸緱氏嶺令威未語城東門可憐仙質落塵網

竟與凡鳥同爭喧當時憐寵意已極遂令士卒空銜冤
一朝狄難有誰禦俛首無聲難報恩沉吟為爾發浩歎
遙天月墮煙生昏

僊鹿

空山白雲護陰石鹿過深苔印行跡春風長茸暖猶淺
蒼雪點身寒未濕應歸蓬島羣仙家日永恣慵眠彩霞
自向瓊田飽芝草肯來禁苑偷奇花誰言一金汝無用
駿馬千金增價重長遭塵戰驚塵沙何如緩駕飛雲車

題汪康民耕雲堂時奉使歸自爪哇國回星源

鰲溪

有客有客頎而長短髭漆黑雙瞳光東門邂逅喜覩面
問之桑梓應同鄉昨朝叩門特相訪履齒齷齪碎殘花香
自言家住鰲溪上結屋為扁耕雲堂昔年勤力事稼穡
驅牛暝踏山雨涼朝耕西疇雲撲帽夜歸北隴雲沾裳
春煙染成秀苗綠秋風吹熟嘉實黃去年隨雲向閩粵
薦剡已銓薇省郎如何奉使不憚遠仙槎泛海波茫茫

今年攜雲返故里翻思舊業將就荒雲歸巖岫人在野
願欲居隱歌時康徐穉東湖有高躅子真谷口流遺芳
古今人物儻可並悠悠千載遙相望

和紫金庵曉上人韻

高僧結茆住空山懸棧絕磴愁躋攀苦心鍊行息百慮
能悟幻泡如是觀人間但覺歲月速物外始識天地寬
清香馥郁皆蘆蔔密影搖曳惟旃檀黑虎聽經伏層石
蒼龍護法循危欄定學隱峰飛杖錫何須子晉騎鳳鸞

佛燈媚夜燃雲暖衲衣生鮮侵肌寒半生枯坐骨格瘦
幾度談空舌本乾風光模寫入眼底才思紉繹抽毫端
竹床秋爽卧不醒石室日高吟未安而今羨子興瀟散
十年離亂良可歎城郭煙埃驚滿眼生民殺戮痛刻肝
嗟予苦被憂患縛何由握手博一歡常思遠公約元亮
結盟何事攢眉難他時西林作三笑雙鳬定許凌風翰

題孫以仁楓林挾彈小像

孫君皎然冰雪顏翩翩白馬錦覆鞍曉來秋雨濕遠山

楓林點染霜葉丹微酡潮臉酒半酣輕衫似怯風力寒
手中時拈金彈丸弓影微開月半彎何人貌取畫圖裏
瀟灑丰神人莫比既非長楊羽獵士亦非細柳將軍子
自是清賓居幙底怪得風流有如此局促簿書良可恥
才全文武能兼美萬里功名從此始

題煙梅圖

老蛟何年蛻奇骨化作枯梅在空谷根回微暖欲漏春
風纖煙絲裂輕縠仙姿疑隔雲母簾欲露不露誰敢覘

洗髓直求銀漢水飄香肯向含章檐至今留得明月影
誤寄芳魂呼未醒却思深雪在江南羅襪生塵寒夜永
廣平心腸鉄石頑無情空對冰玉顏青鳥來遲碧天濶
夢飛不到羅浮山

鄭居貞自閩歸歛往迎母因賦此餞別

書巢先生豪傑士出自康成通德里平生顯宦傾時流
聲名勃勃秋濤起吁嗟時異事亦殊而今老去將何如
舊境蕭條鞠荒草夢魂常戀長林居季子歸來問松菊

有意誅求結茅屋白雲在望碧山高願學耕田在空谷
當年小隱留武夷讀書奉母情愉怡文章久詫韓侍御
贈言貴比珊瑚枝爛斑綵衣耀晴日皎皎照人冰雪質
潘輿遠導千里途陟屺何須憚行役願言早見登歸程
故園景物關幽情竹林有約久相待煮茶空聽松風聲

鷄鳴臺和劉通判韻

劉項共築鷄鳴臺嵯峨百尺應危哉隆準寬仁有大度
重瞳慄悍非良才劍光電飛大蛇死天心已歸赤帝子

雲起芒碭五色奇咸陽王氣清如水君不見楚歌已絕
荒鷄鳴悲鳳瀟瀟號五陵千古興亡只如此感歎空令
愁思增

題祁門陳友章十景卷

飛龍曉日

金烏啼破扶桑暝凌晨刷羽飛龍頂海雲綯綵萬丈紅
青山都散晴霞影白頭凝睇咸池東浴光竟屬何人功
義和緩轡且停馭負暄欲獻輸微忠

歷山遠漢

雨痕洗淨秋容碧翠潑晴嵐曉凝濕山高不破河漢流
冷風吹送行雲急登高望遠何茫茫欲弔虞舜思時康
沉吟未盡懷古興鳳飛不到青天長

紫溪桃浪

芳春已破三月中桃花參差吹暖紅膩香漲雨紫溪潤
霞翻晴浪搖青空漁郎已去漁舟在白髮避秦秦世改
中流變化神鯉多日夜朝宗向東海

芳草煙樹

殘虹閣住微雨收晴光倒射芳草洲嫩綠扶春上溪樹
樹繞翠烟如水流涼陰垂垂暎漁舫葉幄寒風疑步陣
碧雲不斷楚天低昏昏暝色迷人望

鼓樓晝晴

曉角吹散行雲飛扶桑枝頭日弄輝晴山凝春得春色
嵐光作雨翠撲衣樓頭塵壓鼓聲靜燕子窺人春晝永
欄干十二轉東風自捲疎簾看花影

藻潭夜月

石潭淵澄小於沼
汞液飛光瀉晴昊
蟾孃洗頭濕翠雲
亂髮梳殘化文藻
鏡波帖帖寒影孤
皎然清冰凝玉壺
馮夷夢愕夜起舞
手中奪得驪龍珠

峽山朝雲

青山冒頂雲作巢
兩峯勢挾同峽高
曉風急雨忽吹散
滿地勃勃翻雲濤
白衣蒼狗變化速
從龍伴鶴無拘束
卷舒怡悅隱者心
不似襄王誇宋玉

西峰暮雨

西山山頭欲頽日陰雲作昏山已失子龍翼母歸澄湫
秋風捲地波濤立銀竹挿空雨脚來倚欄縱觀簾半開
天河疑漏勢轉急洗盡埃氛遍九垓

滄溪晚歌

滿溪秋波浸霞影天光壓碎玻璃冷孤舟載月遠浦歸
沙鳥驚飛鷗夢醒披蓑老漁黃髮多鼓柁自唱滄浪歌
數聲欸乃未終聽水深風急將奈何

江村夕釣

青山倒銜半邊日江天鳥度煙光夕霞縷牽絲百尺長
一竿裊裊秋風急琉璃影滑波無痕霓綸牛餌魚不吞
白頭貪醉嬾歸去蘆花香裏開清樽

題吉知事五山圖

平陽五山高接天朝暮吞吐多雲烟洪荒破後知幾年
丹崖翠壁開金蓮太行遠起勢欲騫峨峨萬仞倚不偏
下視諸峯培塿然中原巨鎮雄且專堯山特立可比肩

橫截坤軸相牽聯幽崖砢留其巔舜山羅列突在前
七竅下瞰窮深淵至今疑有潛蛟眠石室空洞堪夤緣
奇怪得非神斧鑄想初側微躬力田野人讓畔同周旋
禹山正峙東南邊脉絡直抵黃河壩懷襄世遠思古先
衆流隨濬歸平川九州安奠人民全耕有桑麻居有廛
析城之山更蜿蜒巖巒環拱城壁堅神湯禱旱志益虔
剪爪斷髮為牲牷五山四聖名猶傳吉侯家世人推賢
平生詞翰爭奇妍紅蓮幕下如神仙遙瞻五山路綿延

結廬舊隱依林泉故鄉思念情未宣畫圖不盡心拳拳
嗟予愧乏筆如椽為侯擊節哦長篇

題墨梅

臞仙學仙被僊謫何年飛身下瑤闕袖中猶帶返魂香
熏透瓊英寄愁絕玉京路遠不得歸歲歲江南歷冰雪
白鶴唳斷孤山雲青禽語冷羅浮月自從影落墨池春
清氣猶存勵清節縞衣誰恨污緇塵要識廣平心似鐵

題枯木竹石

滄江昨夜秋風起，翠濤怒吼翻蛟尾。
怪石雨侵雲母寒，枯株風掉珊瑚倚。
瀟湘洞庭煙冥冥，遙天目極疑山青。
重華已遠二妃怨，玉簫吹與孤鸞聽。

題梅蘭竹石圖

羅浮仙子騎白鳳，翠禽啼破寒香夢。
飛向淇園覓秋實，風觸湘纍珮聲動。
同心比石堅不移，貞姿勁節相因依。
平生四美托交契，歲寒盟好深天機。
硯池波翻月涵墨，寫出清標素綃濕。
廣雲湘雨路迢迢，淪落江南總塵迹。

題枯木竹石圖

子龍吟風翼老蛟湘江怒立翻波濤長星垂光驚墮地
化作怪質峻嶒高何年墨仙下人境醉染冰膚散清影
兔錐鋒礪刺蛟龍腥血糝糊吹不醒

墨仙騎龍東海歸袖中帶得東海石翩然更欲遊三湘
彷彿蒼梧二妃泣翠雲染就琅玕青鐵網罩取珊瑚赤
墨仙夢熟呼不還濕透鮫綃見遺迹天河月淡夜窗虛
瀟瀟涼動秋聲急

神人施鞭石能語怪質稜稜天所斧雨餘流潤吐玄雲
三尺新波漲湘浦馮夷驅雷怒蛟翻皇妃御風翠鸞舞
極目東南烟霧深九點疑山幾今古

黃陵廟前呼鷓鴣秋陰漠漠昏蒼梧南巡不返二妃怨
苦竹叢深西日晡微風吹涼下翡翠空江浴影搖珊瑚
當年游處今復見湘水湘雲歸畫圖

題趙昌折枝山茶圖

江南冰雪苦作寒萬物憔悴無好顏東皇有意漏消息

先送一顆回春丹朱砂亂點竊頂碎絳裙深染猩血殷
趙昌創法奪天巧陽和脉脉生毫端遽能貌取豔麗質
胭脂未洗香雲乾至今沒骨久不見徐熙已矣空長嘆
生綃拂拭得奇玩嫣然疑在山林間卷圖吟罷注雙目
彩霞光射青天寬

題嚴子陵釣臺圖

炎劉焰熄幾不燃莽星妖光萬丈懸卯金爐中虹吐烟
赭肩羣聚蟻慕羶天心豈願刮席玄赤龍飛起白水淵

六合電掃皇風宣英雄趨朝遣鷺鷥侯王濟濟相後先
億兆臣伏孰敢喧子陵高卧志益堅冥鴻避弋能孤騫
平生和好如荒堧一貴一賤忍棄捐九重召入玉榻眠
列宿磨盪驚失躔羊裘歸來破露肩釣竿裊裊晴絲牽
東京清節推獨賢高臺屹立石一拳千秋萬古名猶傳
空山青青水潺湲

題何養素煮雪軒

水曹耳孫冰玉質亦愛觀梅東閣立梅梢乾雪手可拈

拾取春芽和瓊液方爐熾火金烏騰孤鐺煮月銀蟾泣
珠璣脫串暗有聲瑤瓊碎屑輕無迹萍雨疑跳春浪驚
松風悞雜秋聲急竊飛影墮烟榻寒蛟浮氣裊雲牕濕
風流不讓陶穀誇高致敢與盧仝敵詩脾涼沁蔗漿融
渴吻香零甘露浥吟哦幾度三嚙餘乾坤清氣歸胸臆

題何養素馬圖

房星降精龍作胎渥洼之水深如盃夜飛霹靂電光紫
良駒已產真龍媒長鳴超羣空冀北下視衆馬皆駑駘

天生氣質難委棄萬里入貢何年來聖恩已許充內廐
九重蕩蕩天門開鐵銜寶勒鏤銀汞玉鞍絲轡粧玫瑰
雖調德性閑兩服終逞逸氣凌九垓王良老去復誰御
伯樂往矣令人哀百年變化尚形迹生綃寂寞煩松煤
求賢求駿同一理千金買骨逢奇才燕昭致禮郭隗重
何人再築黃金臺

題李白玩月圖

長庚之星光配月何年降精生李白倏向人寰汗漫遊

骨異神清本仙謫平生愛月如嗜飴老蟾流輝沁詩脾
胸中玲瓏廣寒殿珠璣欬唾天香吹良宵醉月坐花影
銀汞鎔階光炯炯夢咽玄霜玉兔寒露濕錦袍呼不醒
慣賒月色長安春玉環媒私力士嗔清平調新聲未絕
樓船迫脅連邊塵夜郎天高月黑黑忍死投荒去京國
金雞放赦歸江南采石波寬酒盃窄眼花捉月月倒懸
翻身起舞水中天馮夷夜護叱河伯遺骸肯汙飢蛟涎
巫陽下招招醉魄帝遣歸來住蟾闕精神仍作長庚星

萬古千秋伴圓缺

此圖汪仲魯作序司訓滕與善誦此詩數過擊節嘆賞曰序可作此詩不可續矣當於古人中求之

題長江萬里圖為趙中道賦

中道蜀人

一廬老屋城南隅讀書樂道非愚夫西川有客踏秋雨訪予手把長江圖披圖細數經行處天山白積銀為樹冰漸暖沁六月流雪波怒向三巴注蜀江溶溶遠紆回巨靈擘破巫峽開勢雄地東不得逞直走萬丈疑奔雷

瞿塘灩澦天下險，巨石雙分銳磨剪。盤渦每憂巨浸深，
冷噴猶嫌急波淺。人鮪甕頭雲結愁，饒蛟畫舞寒風秋。
至喜亭邊可貰酒，秣歸縣前仍艤舟。荆湘蕩漾平於掌，
蒲帆箭疾飛雙漿。蒼龍山露翠烟中，白虹水接銀河上。
岳陽樓高明月涼，仙人踏冷鶴背霜。玉簫吹碎丹鳳語，
寶劍拭動青蛇光。洞庭茫茫接彭蠡，千里相望同尺咫。
無情五老蒼顏凋，含羞二姑黛鬟美。揚瀾瀦瀦鄱湖寬，
水府馮夷嚴守關。明珠泣墜淵客怨，冰綃織就鮫人閑。

臬磯秉靈孫小女冷風條度神巫語客回望盡江東雲
鳥歸帶得淮南雨須臾放棹下金陵蓬萊宮闕高峻增
黃衣聖人御宸極紫霧衝霄王氣騰浪遊歷記萬餘里
愕夢驚魂幾悲喜江花江水興無窮點染丹青煩畫史
賦詩題畫心悠然才思安得如湧泉酒酣擊節唾壺缺
長歌杜陵壯遊篇

題邵思誼小景次韻

山含濕翠雨新沐山下茅茨繞松竹斷磯波縈皺穀紋

噴石飛泉響瓊玉長安幾度九鼎遷桃源風景猶依然
按圖卜居儻可得吾將歸隱拋塵緣

題匡廬雪霽圖

宇宙有此匡廬山羣峯層疊如髻鬟地鍾天造稱勝境
異人往往居其間至今遺跡尚可覓山靈夜護不敢干
樂天草堂雲卷幙靜脩藥爐月吐丹匡君書屋猿嘯樹
惠公講座鶴守關瑶田芝草烟漠漠石牀苔花雨斑斑
林光曉拖橫練濕松聲時動踈籟寒昔年一往縱遐覽

平生壯遊眼界寬，冥搜景物入吟詠。揮洒未怪才思慳，
是時冬深紛雨雪。六花亂舞來人寰，崆峒尚遠何杳杳。
混沌未判猶漫漫，青藏古檜失天矯。白暎列岫迷巔岼，
瓊仙定降錦屏曲。玉女自浴銀河灣，遙連二孤悲素影。
近挹五老愁蒼顏，天公貺我太清絕。此時此景真奇觀，
故鄉泉石起深念。洞天再覓途路難，星霜荏苒落塵夢。
無因置我雙珮環，尋幽訪道償夙願。投簪幸遂心迹閑，
何人胸中奪造化。真境彷彿生毫端，舊遊歷歷頻指點。

晴窓對畫俄長嘆悠然蓮社十八友白頭元亮應當還
追思高賢不復見坐聽飛瀑空潺潺

題蹴踘圖

宋祖宋宗趙普楚
昭輔黨進石守信

李根九泉枝葉萎五季閏位迭興衰戈鋌相尋危易危
後唐承統緒乃微何煩祝天天已知夾馬營空王氣奇
趙家生子龍鳳姿平陽後盾孱弱資木札兆先人不疑
陳橋倉卒胡爾為舉世羣雄競追隨明良相逢同一時
會合正遇風雲期乘閒且復相娛嬉軍中之樂諒亦宜

青巾白袍太耳兒歷年三百開洪基紫衣穆穆善容儀
熒煌燭影難逃譏黑帽綠衫燕尾眉翩然對蹴手攬衣
相業曹隨繼蕭規昭輔大面無豐頤側身注目從旁窺
太尉粗俗紛鬢絲平生羔酒香凝卮衣色淡黃巾色緇
石郎並肩立不移是中年老茁白髭姓名未識知為誰
君臣汗竹聲光垂當時邂逅忘等夷豈意後世圖畫之
龍香兔頰含餘悲煜煜東井奎壁輝八荒四海咸雍熙
自從感慨歌五噫故都茫茫黍離離嗟哉往事不可追

目送飛鴻起遐思

題山水圖

羣山起伏如驚龍特立不屈疑爭雄
遙天斜出紫菡萏落日倒射青芙蓉
長溪縈迴遶山麓細瀨淙淙漱寒玉
烟凝向暮波光酣飛來亂點輕鷗浴
林間結屋誰幽棲踈窓俯碧虛檐齊
彷彿神仙金華洞依稀漁人武陵溪
人間真境空寂寂每憑毫素留遺迹
雲迷不返捕魚舟雨冷猶存化羊石
我居大好山水州金華武陵路悠悠

按圖奇勝不用得長吟聲撼松風秋

題虎嘯風生圖

南山虎穴雲冥冥猛獸中居藜藿青林深谷暗日欲暝
據地大吼風泠泠黃熊赤豹莫敢觸狡兔妖狐徒自伏
威稜震耀電目光視雄眈眈欲逐逐昂頭掉尾時欠伸
食麋攫犢秋復春短衣匹馬有李廣折弧墮矢無裴旻

題畫

青山盤盤俯溪水亂石平沙露洲渚扁舟一葉泊漁磯

老樹秋聲作龍語何人讀書坐船頭投竿罷釣絲綸收
小童歛火蘆葦濕酒香魚美無閒愁向晚天寒斜日暝
雲歛風輕波影淨倦來拋書動清酌吳歌越歌不堪聽
我生欲效張志和頭戴窮笠被青簑非熊夢斷心已寂
自甘衰老將奈何

題畫為芝黃汪志高作

蒼松蛻骨蚪龍蟄滿地清陰雲氣濕山中採藥人未歸
老翁杖藜童子立翁來問師日欲西直疑劉阮迷路迷

尋真未遇興盡返武陵空覓桃花溪至今却憶芝黃野
松月軒中足清趣深根伏苓大於人獨荷長鏡斲秋雨

題牧牛圖

綠野春深平似掌土脉膏黏皆沃壤羣牛耕罷飯雨肥
萋萋豐草和烟長承平每書大有年禾黍連被東西阡
早驅晚牧少拘束人牛兩閒不用鞭一童騎背向歸路
推先呼後頻返顧一童跨伏身半欹昂首訴風天欲暮
我生長大居山林慣識此景天機深自甘食力老農業

歌殘白石嗟無心

春耕驅牛聲叱叱釋犁隨意放原隰
蕭蕭老樹風勢狂彷彿隔山雨來急
小童坐背不用牽綠簑濕短青笠圓
一牛徐行繩在手一牛回顧疑爭先
更看最後緩追逐日暮天昏歸路熟
草肥水暖意自閒蹄健力強非穀餽
時平樂業甘為農處處擊壤歌年豐
黍稷盈囷官賦足但願稱作多牛翁

題秋江捕魚圖

秋江雲淨島嶼孤澄波萬頃平若鋪烟收日暮魚正出
漁人羣聚相喧呼或垂大罾或舉網小船如梭捷來往
天空嗷嗷鴻雁鳴風輕淅淅菰蒲響行客步遲心急歸
盤灣隔崦通徑微恍類黃州赤壁岸又疑青山采石磯
我生慣識江湖景已歷風波塵夢醒短簑圓笠釣絲輕
結盟鷗鷺從漁隱酒酣耳熱成清歌吳音越調商聲多
羊裘已敝身自老玉璫未得心如何令我披圖發長嘯
滿目楓林半殘照東津誰續觀魚篇少陵魯鼓三巴擢

贈天台張思文

天台之山高插天赤城雁蕩相勾連石橋流水秋不竭
聲鏘玉佩何涓涓朝沐雨痕疑彩雲暮浮霞影生紫烟
洞府深沉異塵世月明笙竊來飛仙乾坤清氣不肯散
鍾英吐秀生才賢故家乃有赤松裔祕書曾授黃石篇
至今文獻久未墜冠蓋相望聯後先椿翁佐政留古歛
治同斯立居藍田棠陰日永訟庭靜愛民不忍施蒲鞭
今春令子事省覲弟昆列侍行周旋言歸故鄉又遠別

穩泛浙東秋雨船
臨岐索贈無好語
蠶頭字拙紈扇圓
綵衣奉養尤切切
白髮待望應拳拳
冬初再期一聚首
莫使風雪踰殘年
丈夫那作尋常別
長歌起舞揮龍泉
虹霓浩氣心愈壯
飲酒有如鯨吸川
嗟我老生年半百
瀟瀟霜鬢成華顛
刀圭欲覓安可致
凡骨未超塵俗緣
為語天台衆仙侶
紫陽悟道探玄玄
蓬瀛得路儻相遇
會當寄我青瑤編

新安八景詩

屏山春雨

屏山在城東為真人聶師道修煉之所真人羽
化於揚州有駕鶴乘空之異竈劍履于是山之
形方類屏宸當春月微雨沾浥花木蒼蔚紛紅
駭綠宋黃台有詩曰萬仞花屏問政山故稱華
屏又名問政云

問政春山高倚屏白雲飛去遙天青松巢雨暝鶴回晚
丹池風急龍歸腥至今劍光夜不散石枰棋冷斧柯爛

三耳仙人濕羽衣當年醉熟瓊花觀

練溪朝雲

新安之溪流濬源于楊之水直瀉數十里望之
如練帶然昔人有千尋練帶新安水之句故稱
曰練溪每春曉雨止白雲橫溪雲水相連影搖
素練真奇觀也欲吟咏之恨無謝眺驚人語
耳

溪流素練三千尺寒光搖曳朝雲濕風驅勃勃海濤翻

瀾漫欲浸天宇碧帆歸衝斷半溪分扶桑日照收氤氲
數聲漁唱破清曉沙際驚飛鷗鷺羣

紫陽夜讀

紫陽山勢若飛鳳昔我徽文公寓閩南猶以是
山名其讀書之樓以表其不忘桑梓之意後之
學者面山構書院以為講學地宋穆陵賜紫陽
書院四大字刻於貞珉至今猶存兵燹餘再遷
于東城縣學之旁

新安講學尊紫陽書堂夜永聲琅琅穆陵宸翰鸞鳳翥
奎壁下貫晴虹光上探孔孟繼濂洛道重泰山與喬嶽
神遊故國想歸來月明應化遼天鶴

烏聊曉鐘

唐越國汪公華保禦六州嘗屯兵于是山遂營
州治焉公識機慕化而歸于有唐不失臣禮錫
以旌節鄉人德之立祠以祀山冠以危樓環以
雉堞懸以禁鐘昕夕叩之鏗錡聲徹數十里

烏聊山頭殘曉月光射落星蒼石裂當年故壘埋劍刀
至今猶帶英雄血華鯨吼散秋空雲六街車馬何紛紛
一百八聲聲更徹直恐夢驚天上聞

漁梁夕照

漁梁俗傳宋太守袁公所作也在表城門之南
練溪之下流以南離火盛故堰水以厭勝之空
其中以通舟楫之往來日欲晡歸帆渺渺落雁
翩翩行人若蟻緣營營然不息登高下視之則

夕陽在鵝背天然畫本也

欲落不落晚日黃歸雁寫遍遙天長數聲漁笛起何許
孤舟下瀨如龍驤漠漠烟橫溪萬頃鵝背斜陽駐餘景
叩舷歌斷蘋花風殘酒半銷幽夢醒

古巖晴嵐

古巖去歙西三十里山形如覆盂甚童而無草
木徠南有石巖空洞下可容數百肘僧結廬居
之而棟宇半接于巖前度佛像其中遇春曉則

晴嵐冉冉耕夫牧子出沒於隴畝烟靄之際亦可愛也

天遣六丁來下鑿紺宇參差出樓閣空巖不見椎斧痕
母乃混沌元氣撲嵐光林影迷烟霏輕浮翠雨涼沾衣
樵歌未起行人少山僧飛錫朝來歸

黃山霽雪

黃山舊名黟山唐天寶六年勅改黃山世傳黃
帝與容成子浮丘公講道於是今藥鑪丹竈具

存有朱砂泉陰火潛燃氣如饋餉有奇峰三十
六每當積雪收霽日光倒射諸峰聯絡玲瓏勢
若削玉善畫者不能殫其巧焉

三十六峰青作朶朱砂泉香煮陰火澗鳴流碎瓊瑤英
崖空積遍珠璣顆日光倒射玉芙蓉羣仙問道來崆峒
臨風環珮儻可挹便欲飛身騎白龍

白水寒蟾

白水在歙城之南二里許山勢外周固而內寬

平地湧泉一泓瀦為小池冬夏不枯泉色甚白
如石髓玉乳融液動盪每夜永寒蟾流輝微風
颺之光漾不定有若走汞池之旁構梵宇宏麗
以是勝其額云

小池湛湛玉色泉直疑下有白龍眠山靈擘破石髓溢
一泓空碧涵漪連幽人和月掬在手笑吸清輝當春酒
酒酣大叫問山靈千年誰是知心友

七言古體詩一章共二十四韻不揣蕪陋錄送

鄭彥彬赴王駙馬都尉館時兄彥昭亦寓閩中
聖皇六飛渡江水義旗所向羣奸弭金陵龍虎挹神京
鬱葱王氣衝天紫攀鱗附翼俱英雄文武赫若和陽公
榮膺國戚聯肺腑秀毓星斗羅心胸憶昨董師臨古歛
招賢喜遇詞章伯賈誼聲華擅獨奇鄭虔才思推三絕
去年移戍當會稽絳帳戎幙相追隨乞假歸來養慈母
豈意淚著堂萱萎今年又喜鎮閩海走幣遙遙千里外
誰言坐冷客無毡懸榻塵凝久相待於焉判袂不可留

青山綠水增離愁。素金曾為陸賈贖。蠻音推結。今南州。
氣候炎蒸異。中土嚴霜虐。雪何曾覩。椰子酒殘。焚鷓鴣。
荔支雨歇。啼鸚鵡。主賓相見。情愈深。洗盡別來。慕蘭心。
有時覓句。月窺戶。幾度談經。風滿林。君家難兄。代希有。
喪亂升沈。十年久。昔時青馬。卸雕韉。今日酡顏成皓首。
吁嗟。世事何必論開懷。且倒玻璃尊。萍蓬得聚。海上國。
猿鶴入夢。江南村。賓主弟兄。真四美。此樂人間。果難擬。
機雲孝友。出彛倫。管鮑交情。忘爾汝。願言歲晚。罷功名。

歸與谷口堪娛情好披襁襁立烟雨數聲布穀催春耕
十八學士卷

隋亡晉陽啟唐祚錦帆未返江都路野鳥為鸞人肆欺
天心厭亂誰能訴一朝裴寂成深謀家國轉變汝所由
白旄黃鉞兩京定四海晏然無所憂功高德厚稱神武
太子齊王安足數忠臣猛將任股肱寵異宏開天策府
當時賢俊十八人嘉謨直道情相親可否獻替陳至理
何曾宛轉全天倫瀛洲茫茫近蓬島迥隔塵寰風日好

如綸如綽出王言戒逸戒奢箴大寶或稱博學行秘書
或稱忠鯁智有餘陰陽大化任調變經籍奧義煩分區
殷勤疇咨當世務司勲記室并主簿考功祭酒博士倫
著作參軍典簽數是中諸子皆良才十七可尊一可猜
如何驍騰衆龍媒著彼碌碌真駘豈知詒謀傳後禍
雨露纔沾鬢雲髮此獠空憐頭血流斛麥諛言無不可
清風環珮聲珊珊樞趨進退意氣閒龍眠居士有佳趣
好事寫入畫圖間我今展卷起深想千古神交見神像

一時陳迹付逝波肯信流芳在天壤只今幸際休明時
虞舜至治應無為羣賢畢集玉堂署咫尺瀛洲端可期
聖朝豈無此學士我亦趨朝拜丹陛古今人物許同儔
留取聲名繼青史

董宣廟


湖陽公主國懿親白日故縱奴殺人臣為赤縣清輦塵
殺人者死法用伸奔車入奏主勿嗔主欺國法非欺民
民可濫殺焉用臣臣如有罪死楓宸臣如無罪何屈身

當時回天力萬鈞震懾貴戚動九垓生為郎官死勾陳
忠必獲報神必靈宜其廟貌高麒麟

題李營邱枯木圖

營邱枯木天下無筆端造化何榮枯想當盤礴欲畫際
天為助興神為驅鄧林已化防風骨滄海乍出珊瑚株
良材何異徂徠產大用不值明堂需自憐形質赦斤斧
豈嘆薪爨供樵蘇萬牛回首力未許獨匠指顧心難圖
空遺偃蹇蔽村野白石鑿鑿泉鳴鳴枯梢似挂瘦蛇影

亂葉恍出乖龍鬚我生本是山澤叟隱居林樾同凡夫
昂霄聳壑日在望號雨呼風時與俱只今廊廟重締構
梗楠杞梓當貯儲按圖工師儻所取意營目盼增嗟吁



梧岡集卷二